

Thursday, August 28, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

ASSEMBLY-ginger

Chief Minister Pu Lalduhoman sawhthing leina man la pek chhuah loh chu pawisa an neih loh vanga pe lo an ni lova, fello chinfel ngai chinfel apiang te hnenah pekchhuah zel a ni a ti.

Vawiin Assembly session-a sawhthing chungchang zawhna chhanaah House Leader chuan sawhthing man an pek tur hi cheng vbc 95 leh nuai 63 vel a chhut mek a nih thu a sawi a, budget a cheng vbc 110 ah dah a a daihlo zawng chu handholding atangin an pe dawn a, a inpeih apiang an pe zel ang a ti.

ZPM sorkar flagship programme Bana Kaih- Handholding Scheme hnuaiah sawhthing leina tur hi dah tel a ni a ti a, sawhthing ah chauh dah lovin, entrepreneur te, innovator te tan te, special package poh dah vek a ni, a, a tul apiangah an hmang zel dawn a ti.

(CM BYTE)

Vawiin sessiona zawhna chhangin Agriculture Minister Pu PC Vanlalruata chuan kum, 2025 feb 20 leh june ni 30 inkar chhung khan sawhthing an lei a, aug ni 16 thlenga report an dawn danin, sorkarin sawhthing alei zawng zawng zat hi qtl nuai 3 sing 4 & 5943 a ni a, sum sen zat hi cheng vbc 70 leh nuai 19 vel niin, a la pung zel a ni a ti.

Sawhthing hi thuang hniah an lei a, Phase 1 chu feb 20 atanga april 20 chhungin an hawng a, hetah hian kg ah cheng 50 in an lei a, phase 2 chu april 21 atanga-june30 chhung niin company hnenah auction in an hralh a, a leitu company te hian lei zuiin an leina man cheng 50 a tlin lohna zawng support price sorkarin a pe a ni, a ti.

Agriculture Minister chuan Sawhthing leikhawl te hi hralh chhuah lehngal a ni tih sawiin, auction ah a chhang sang ber hnenah a hralh chhuak leh a, sorkarin sawhthing lei nana a sum sen atang tun dinhmunah cheng vbc 17 leh nuai 78 hmuh let a ni a ti a ni.



SESSION : revenue

Land Revenue & Settlement Department changtu Minister Pu B. Lalchhanzova'n Riverine Reserve Forest area huamchhunga tunhma atanga Huan/Ram/Inhmun Pass nei tawhte ram chungchangah sorkarin a chhuichuangtu tur Special Investigation Team a din tawh a, hma a la mek tih a sawi.

He thu hi wawiina Assembly Session-a zawhna leh chhanna hunah sawiin, Minister Pu B. Lalchhanzova chuan Riverine Reserve Forest area huamchhunga

tunhma atanga Huan/Ram/Inhmun Pass nei tawhte ram chungchang ngaihtuahin Sorkar-in hma a la mek a ti a. Supreme Court-in Forest Area-a mimal ram awmte chungchang chhuichiangtu tur Special Investigation Team (SIT) din tura State leh U.T tin Sorkar-te a tih angin, General Administration Department chuan August ni 19 khan Special Investigation Team (SIT) chu Notification chhuahin a din tawh tih a sawi a. Riverine Reserve Forest huamchhunga Huan/Ram/Inhmun Pass, Court thutlukna awm hma a lo nei sa tawh te Pass renew phalsak dan chungchangah pawh sorkarin hma a la mek tih a sawi a ni.



AIR NEWS

Chanchintha hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchintha hi ngaihthlak leh chhiar theih a dah a ni.

Zanin dar 6 leh a chanve ah Chanchintha puan leh a ni ang.



MPCC

Congress Party chuan, ZPM kaihhrui Mizoram sorkarin kum 2025-2026 Budget ah cheng vaibelchhe 1651.68 puk an tum laiin, thla thum chhungin an puk tum zat atanga zaa 71.35 lai an puk tawh a ti.

Vawiina Aizawl Press Club-a thuthar thehdarhtute an kawmnaah MPCC Media Department chuan CAG report behchhanin ZPM sum puk dan chungchang an sawi a, ZPM sorkar chu tun ang zela sum an puk chuan kum 40 lo sawrkar tawh ten kum 40 chhunga an bat aiin ZPM sawrkar in kum 5 chhunga an puk a tam thei dawn a ni an ti.

Chief Minister leh Minister thenkhatten tunhnaiah Budget chungchang dikhlel deuhin an sawi thin ni-a sawiin, Finance Department in RTI zawnha an chhannaah ZPM chuan sawrkarna an chelh tan kum 2023 December atanga kumin June thlang khan cheng Vaibelchhe 6214.27 an puk tawh a, kum khatah cheng vaibelchhe sangthum chuang an puk tihna a ni tih sawiin, hei hian ZPM sawrkar hnua leibat zat cheng vaibelchhe 500 ti a an sawi thin chu thudiklo chhang tak a ni tih a lantir an ti a ni.

CAG in Mizoram sawrkar sum dinhmun, unaudited provisional figure thla tin a tarlan thinah kum 2024-2025 chhung khan cheng vaibelchhe 3133.45 lai an puk a, Budget a puk an tum cheng vaibelchhe 1365.70 aia an puk tamna chu zaa 229.44 lai a tling an ti a. ZPM sawrkar in kum 5 chhunga an puk a tam thei dawn tih sawiin, ZPM kaihhrui sorkarin leiba an rullh zel avanga leibat tlem hle anga an sawi thin chu chhut chian a ngai hle an ti bawk.

Byte: MPCC media

Hei bakah hian Chief Minister-in Independence Day-a a thusawi ama ziah ngei a ni tih a sawi chu tha lo an tih thu sawiin, Sawrkar hmalakna leh hmachhawp te Department hrang hrang hotuten an lakhawm chu Chief Minister-in a chhiarchhuak thin a, an duh angin an ziaik ngai lova, politics a hlawkpui phei chu an tum ngai lo an ti a, ZPM kaihhrui sorkar chu Protocol nei lo ang maia kalin,

Concern Minister te lo sawi khalh leh lo sawi sak ching Minister leh MLA te an awm bawk a, kalphung thar chu a mumal lo an tih thu an sawi a ni.

